

每週經課朗誦經文（巴克禮漢羅/教羅）2015/02/08

共同經課-1 以賽亞書四十章二十一節～三十一節

21 Lín kiám 未知 mah? lín kiám 未聽見 mah? tù 起頭 kiám 無 kā lín 講 mah? tù 設立地 ê 根基 lín kiám 無明白 mah? 22 主坐 tī 地 ê 大環，地上 khiā 起 ê 百姓親像草蜢；祂展開天親像帳幅，安置伊，親像 thang khiā 起 ê 布棚。23 祂 hō 君王歸 tī 無；hō 地上 ê 審判官成做空虛。24 In 是 tú-á 栽，tú-á 種；伊 ê 叢 tú-á 釘根 tī 地裡；祂一下吹 tī 伊頂面，就 lóng 枯焦，捲螺風將伊吹去，親像草幼一樣。25 至聖 ê 講，Lín beh 用 chī-chūi 比並我，hō 我 kap 伊平 ah? 26 Lín kiáh 目看頂面，看 chī-chūi 創造 chiah-ê，照賬目 chhoā hiah-ê 萬軍出來；祂一個一個稱 in ê 名；因為祂 ê 權能，koh 因為祂 ê 大權能，大氣力，連一個亦無欠。27 雅各 ah，你啥事講，以色列 ah，你啥事講，我 ê 道路隱密 tī 耶和華，我 ê 案件無得 tiòh 上帝料理。28 你 kiám 未知 mah? 你 kiám 未聽見 mah? 永永 tī-teh ê 上帝，耶和華，創造地極 ê，祂無厭，亦無倦；祂 ê 智慧無 thang 測度。29 厭倦 ê 祂 hō 伊能力；軟 chiaⁿ-ê，祂加添伊 ê 氣力。30 少年人亦會厭會倦，勇壯 ê 人亦會跋倒。31 獨獨 oá 靠耶和華 ê beh 得 tiòh 新 ê 氣力；in beh 親像鷹鳥 thī 翼飛高；in 走，亦無厭；行亦無倦。

共同經課-2 詩篇一四七篇一節～十一節，二十 c 節

1 Lín tiòh o-ló 耶和華；因為唱歌 o-ló 咱 ê 上帝，是真好真妙；O-ló 是合宜。2 耶和華起造耶路撒冷；聚集以色列中受遷徙 ê 人；3 伊醫好傷心 ê 人；包 in ê 傷。4 伊算星辰 ê 數額；Sùi 粒 kā 伊號名。5 咱 ê 主至大，極有氣力；伊 ê 智慧無窮盡。6 耶和華扶持謙卑 ê 人；將 pháⁿ 人降低到土腳。7 Lín tiòh 用感謝 ñg 耶和華唱歌；彈琴唱歌，o-ló 咱 ê 上帝。8 伊起雲遮天，為 tiòh 地備辦雨，Hō 山發草。9 伊賞賜食物 hō 走獸，Kap teh-哮 ê 烏鴉 kiáⁿ。10 伊無意愛馬 ê 力大，伊無歡喜人 ê 腳 gâu 走。11 耶和華是歡喜敬畏伊，Kap ñg 望伊慈愛 ê 人。20 Lín tiòh o-ló 耶和華。

共同經課-3 哥林多前九章十六節～二十三節

16 我傳福音 m̄ 是 thang 誇口 ê 事，是不得已 nā-tiāⁿ；因為若無傳福音，我就有災禍。17 我若甘心做 chit-ê 事，就有報賞；就若 m̄ 甘心，有職任已經交代我 lah。18 Án-ni 我 ê 報賞是甚麼 ah? 就是我 teh 傳福音，hō 人免所費也會得 tiòh 福音；免得我 tī 福音所有 ê 權用到盡。19 我對 tī 眾人 sui-bóng 是自由，iáu-kú 將家己做眾人 ê 奴僕，為 tiòh beh 得 tiòh 人 ná choē。20 Ñg 猶太人我就親像猶太人，beh 得 tiòh 猶太人；ñg 法下 ê 人，我雖然本身無屬 tī 法下，就親像法下 ê 人，beh 得 tiòh 法下 ê 人。21 Ñg 法外 ê 人，我就親像法外人，beh 得 tiòh 法外 ê 人；其實我 m̄ 是 tī 上帝 ê 法外，就是 tī 基督 ê 法內。22 Ñg 軟弱 ê 人，我就成做軟弱，beh 得 tiòh 軟弱 ê 人。Ñg tak 號人，我成做 tak 號款，一概是 beh 救人。23 tak 項事我因為福音來行，是 hō 我 thang saⁿ-kap 有份 tī 福音。

共同經課-4 馬可福音一章二十九節～三十九節

29 In 已經出會堂，隨時 kap 雅各約翰入西門 kap 安得烈 ê 家。30 西門 ê 丈母患 tiòh 熱病倒 teh，隨時有人將這 kā 耶穌講。31 伊近 oá 牽伊 ê 手，hō 伊起來，熱就退；婦人人就伺候 in。32 到黃昏暗，日落了，有人 chhoā lóng 總有破病 ê，kap 患 tiòh 鬼 ê 人就近伊。33 Thong 城 lóng 聚集 tī 門口。34 耶穌醫好 tak 樣病 ê 人 choē-choē，koh 趕 choē-choē 鬼；因為鬼 bat 伊，所以 m̄ 准 in 講。35 隔早起，天 iáu 不止暗，耶穌起來出去曠野 ê 所在，tī hia 祈禱。36 西門 kap 同伴 ê 人追 chhē 伊。37 已經 tú-tiòh 就 kā 伊講，眾人 lóng teh chhē 你。38 伊 kā in 講，咱來去別位；到附近 ê 埠頭，hō 我 thang tī hia 傳道；因為我為 tiòh chit-ê 事，chiah 出來。39 就去遍加利利，入 in ê 會堂，宣傳道理，koh 趕鬼。